

SANCTISSIMI D. N. DOMINI
INNOCENTII

Diuina Prouidentia

P A P Æ XIII.

*Apostolicæ litteræ super Ecclesiastica Di-
sciplina in Regnis Hispaniarum.*



ROMÆ , MDCCXXIII.

Typis Reuerendæ Cameræ Apostolicæ .

INNOCENTIVS

P A P A XIII.

Ad perpetuam rei memoriam :



POSTOLICI Ministerij, quod Nobis, licet immerentibus, imposuit Superni dispositio Consilij, ratio præcipuè exigit, vt Ecclesiasticæ Disciplinæ in ijs, qui in sortem Domini vocati sunt, aut seruandæ, aut vbi opus fuerit, restaurandæ, iuxta sacrorum Canonum instituta, & sanctissimas Ecclesiæ leges, & ordinationes omni studio aduigilemus; post enim primi Parentis lapsus semper ad inferiora nos demittit humanæ mortalitatis infirmitas, & carnis fragilitate obseruantia vigor paulatim relaxatur; vnde & de mundano pulueri religiosa etiam corda sordescere, & in ipso Agro Domini spinas, ac tribulos identidem germinare quotidiana experientia edocemur: quod si noxia inde euellantur, & vtilia plantentur, dubitandum non est, quin vberior, benedicente Domino, electi sanctorum operum frumenti messis exurgat, omnisque Populus in vja Domini, prælucente Clero, feliciter progrediatur. Cum itaque Dilectus Filius Noster Ludouicus S. R. E. Cardinalis Beluga, & Moncada nuncupatus, Ecclesiæ Carthaginen. ex concessione, & dispensatione Apostolica Præsul, in ipsis Pontificatus Nostri primordijs, Nobis exposuisset nonnulla Ecclesiasticæ disciplinæ rationibus, ac saluberrimis Sacri Œcumenici Concilij Tridentini Decretis haudquaquam consentanea sensim in diuersis Inclytæ Nationis Hispanicæ locis obrepisse, ijsque vt opportunum remedium adhiberetur a Nobis, quibus est commissa plenitudo sollicitudinis, nedum ipse Ludouicus Cardinalis, & Præsul, sed & alij Ven. Fratres Archiepiscopi, & Episcopi Regnorum Hispaniarum humiliter postulasent; eorumque enixis precibus sua etiam studia, ac vota charissimus in Christo Filius Noster Philippus Hispaniarum Rex Catholicus pro eius singulari pietate, & eximio Christianæ Religionis zelo, datis hac de re ad Nos pluribus literis, coniunxisset: Nos Congregationi particulari nonnullorum ex Venerabilibus Fratribus Nostris eiusdem S. R. E. Cardinalibus Concilij Tridentini Interpretibus a Nobis deputatorum rem omnem sedulo examinandam demandauimus. Id autem cum ab ipsa Congregatione Cardinalium ea, qua par erat, maturitate præstitum, il-

liusque sententia ad Nos per eiusdem Congregationis Secretarium relata fuerit; de memoratorum Cardinalium consilio, congruo, & opportunum duximus ea, quæ infra sequuntur, ad Omnipotentis Dei gloriam, Ecclesiæ utilitatem, veteris disciplinæ instaurationem, & spirituales Regnorum Hispaniarum ædificationem, hac nostra perpetuò valitura Constitutione statuere, decernere, & declarare.

Primum igitur, cum a Patribus memorati Concilij Tridentini, Diuino afflante spiritu, sapientissimè animaduersum fuerit, quantum Christianæ Reipublicæ intersit accuratum haberi delectum circa eos, quibus Sacra Ministeria committenda sunt, & in quorum vitam cæteri Fideles iugiter oculos coniicientes sumpturi in de sunt exemplum, quod imitentur; proptereaque prouide ab iisdem Patribus cautum fuerit Ecclesiasticæ Militiæ per primam Tonsuram adscribendos nonnisi illos esse, qui probabilem præbeant coniecturam, se non sæcularis iudicij declinandi consilio, sed sincero animo præstandi fidelem cultum, ac seruitium Deo, hoc vitæ genus elegisse: volumus, vt pro tutiori ipsius Conciliaris sanctionis executione, ab omnibus Regnorum Hispaniarum huiusmodi Archiepiscopis, & Episcopis, non alij ad primam Tonsuram in posterum admittantur, quàm quibus Ecclesiasticum aliquod Beneficium statim conferendum sit; aut quos constiterit litterarum studio operam sic dare, vt quasi in via ad Ordines, tum Minores, tum etiam deinde Maiores suscipiendos versari videantur; vel demum quos viderint expedire alicuius Ecclesiæ seruitio, vel ministerio deputari.

Et tam in his, qui ad primam Tonsuram, quàm in alijs, qui promoueri ad Ordines etiam minores optauerint, omnino seruetur pariter regula ab eodem Concilio Tridentino tradita; nimirum, vt nullus ordinetur, qui iudicio sui Episcopi non sit utilis, aut necessarius suis Ecclesijs, quique illi Ecclesiæ, aut pio loco, pro cuius utilitate, aut necessitate assumitur, non adscribatur, vbi re ipsa functiones muneri suo consentaneas exercent. Quod si qui modo reperiantur, vel Clericali Tonsura iam initiati, vel ad Ordines siue minores, siue maiores iam promoti, qui nulli certæ Ecclesiæ, vel loco pio adscripti fuerint: Episcopi adscriptionem huiusmodi, vel a seipsis, vel a Prædecessoribus suis omisam, statim suppleant, non minus quoad omnes in maioribus Ordinibus, etiam Presbyteratus, constitutos, quàm quoad eos qui vel sola prima Tonsura, vel minoribus Ordinibus initiati, Bes neficium tamen Ecclesiasticum possident. Ex reliquis autem, vt præfertur, vel sola prima Tonsura insignitis, vel in minoribus Ordinibus constitutis, sed Beneficio carentibus, nonnisi eos adscribant, quos Ecclesijs suis utiles, vel necessarios esse iudicauerint. Cæterum antedictæ adscriptionis executionem differri posse per ali-

aliquod temporis spatium, quod ipsis Episcopis conueniens videbitur, permittimus quoad eos, qui a Dioecesi, in qua Tonfuram, vel Ordines susceperunt, causa ediscendi litterarum scientias in aliqua publica Vniuersitate, vel Gymnasio, siue ex alia rationabili causa a suo Episcopo approbata, vel approbanda, absentes reperiuntur.

Cum autem Clerici, qui in Episcopalibus Seminarijs educantur, vt commodius ad litterarum, sacrarumque rerum studium operam, conferre, alijsque a Concilio Tridentino præscriptis addiscendis magis assidue incumbere possint, teneantur iuxta eiusdem Concilij Decretum diebus tantum festis Cathedrali, alijsue loci Ecclesijs inseruire: hanc quidem seruitij per eos obeundi rationem seruari in omnibus Hispaniarum Dioecesibus, necnon ipsos generalibus dumtaxat totius Cleri supplicationibus, siue Processionibus interesse volumus, & mandamus; sublata quacumque maioris seruitij consuetudine, etiam immemorabili, postpositaque etiam quacumque Appellatione, aut Inhibitione. Si quod autem Seminarium reperiatur, in cuius fundatione aliter cautum esset ob adiectam grauioris seruitij legem ab illo, qui Seminarium ipsum fundauerit, seu dotauerit, vel ei piam aliquam largitionem contulerit; Episcopi ad Nos, & pro tempore existentem Romanum Pontificem id referant, vt desuper opportunè prouideri valeat.

Præterea, cum maximè deceat eos, qui propius ad Sacratissima Mysteria accessuri sunt, ultra cætera requisita, congruenti etiam polere scientia, qua præditi viam salutis indicare alijs Christi fidelibus possint: Episcopi non nisi eos ex Clero tam Sæculari, quam Regulari ad Sacros Ordines admittant, quos ob scientiam, aliasque qualitates eo gradu verè dignos per diligentem inquisitionem compererint; adeo vt satis non sit illos, qui promoueri ad Ordines prædictos optant, linguam latinam intelligere, Cathecismo instructos esse, atque aptè respondere quæsitis circa Ordinem suscipiendum sibi in examine propositis. Qui verò ad Presbyteratum erunt assumendi, idonei prius per accuratum similiter examen comprobentur ad ministranda Sacramenta, & ad Populum docendum ea, quæ scire omnibus necessarium est ad salutem: quod quidem vt rectè præstari possit eisdem Episcopus in Domino hortatur, vt, quantum fieri potest, eos tantum ad Sacerdotium assumant, qui saltem Theologiæ moralis competenter periti sint.

Quod si Domicilium in vna Dioecesi habentes, Beneficium verò in altera, ordinari ad eiusdem Beneficij titulum optauerint ab Episcopo, in cuius Dioecesi Beneficium huiusmodi situm est: Episcopus Domicilij debeat eos, si in suam Dioecesim reuersuri sunt, super scientia, vel idoneitate examinare ante concessionem Litterarum Testimonialium super eorum natalibus, ætate, moribus, & vita iuxta Constitutionem fel: rec: Innocentij Papæ XII. Prædecessoris

Nostri, quæ incipit *Speculatores* obtinendarum; additò quoque cõperta idoneitatis testimonio in iisdem litteris; hæque concedi nullatenus debeant, si antedicto exãmine tamquam habiles approbati non fuerint, iisque iuxta præmissam formam non impetratis, minimè possint ab alio Episcopo, cui etiam ratione obtenti Beneficij subiecti sint, ad Ordines promoueri: sique secus fiat, Ordinans quidem a collatione Ordinum per annum, Ordinatus verò a susceptorum Ordinum executione, quamdiu proprio Ordinario videbitur expedire, eo ipso suspensus sit, aliisque insuper grauioribus pœnis pro modo culpæ, Nostro, & pro tempore existentis Romani Pontificis arbitrio infligendis vterque subiaceat. Cumque etiam iuxta memoratam Innocentij Prædecessoris Constitutionem ratione ac titulo Beneficij in aliena Diocesi obtenti non aliter liceat Ordines ab Episcopo eiusdem Diocesis suscipere, quàm si Beneficium prædictum sit eius redditus, vt ad congruam vitæ sustentationem, detractis oneribus, per se sufficiat; declaramus, sufficientiam huiusmodi præsumendam esse, non iuxta Taxam Synodalem, siue morem pro promouendis ad Sacros Ordines vigentem in loco prædicti Beneficij (nisi tamen illud continuam, & præcitam residentiam requirat), sed iuxta Taxam, vel, ea deficiente, iuxta morem in alio loco Domicilij vigentem.

Porrò ad sartam, tectamque seruandam Ecclesiasticam Disciplinam non minùs momenti habet, quod Clericali militiæ nomen dare non permittatur ijs, qui haud satis idonei sint, quàm quod eidem militiæ iam adscripti laudabilem viuendi rationem sectentur, eamque morum exhibeant innocentiam, quæ Sanctitati suscepti Instituti respondeat, multòque magis, quod abstineant ijs, quæ a Sacris Canonibus iure meritoque verita sunt, vt prorsus indigna hominibus Tabernaculum Domini inhabitantibus, & venerando Altaris ministerio dedicatis. Statuimus propterea, atque decernimus, quod, si qui sunt Clerici, aut prima Tonsura, aut Ordinibus minoribus initiati, nullumque Ecclesiasticum Beneficium possidentes, qui, neglectis Concilij Tridentini Decretis, habitum Clericalem, ac Tonsuram non deferant, vel si etiam deferant, non tamen certæ Ecclesiæ, aut Loco Pio, cui ex mandato Episcopi adscripti fuerint, inseruiant, siue in Seminario Ecclesiastico, vel in aliqua Schola, aut Vniuersitate de licentia sui Ordinarij non versentur; Episcopi, nulla etiam præmissa monitione, eos Priuilegio Fori priuatos declarent, eorumque adscriptionem seruitio certæ Ecclesiæ antea factam deleri iubeant. Sique ij meliorem vitæ rationem non inierint, aut etiam si alij sint, quos ex propria culpa efficiendos idoneos promotioni ad Sacros Ordines sperari nequeat; iisdem Episcopi, seruata formâ a Sacris Canonibus traditâ, ad priuationem aliorum Clericalium Priuilegiorum contra ipsos procedant. Vbi

verò

verò reperiantur Clerici Cappellanus, vel Beneficia, cuiuscumque etiam tenuis redditus, obtinentes, quorum improba vita alijs offensionem præbens destruat potius, quam ædificet, vel concubinarij, aut fœneratores, vel ebrietati, ludisue allearum dediti, vel factores rixarum, vel negotiatores, vel arma gestantes, vel incertis sedibus vagantes, vel Clericalem habitum, Tonsuramque non deferentes, vel Ecclesiastica Immunitate in fraudem tributorum, & vectigalium a Laicis non exemptis soluendorum temerè abutentes, vel qui demum similia, aut maiora crimina patrantes, numero magis, quàm merito ad Ecclesiam pertinere visi fuerint; Episcopi, præmissis tamen necessarijs monitionibus, seruatisque alijs de iure seruandis, contra ipsos, ad pœnas a Romanis Pontificibus Prædecessoribus Nostrijs, & a Sacris Concilijs impositas, & etiam ad priuationem Beneficiorum, Cappellaniarum, & Ecclesiasticorum Officiorum in omnibus illis casibus, in quibus prædicta priuatio a Sacris Canonibus imposita est, humanis quibuscumque rationibus posthabitis, procedant, memores seipsos neglectæ subditorum emendationis condignas, Deo vindice, pœnas persoluturos.

Sed & cum Personæ Ecclesiasticæ nunquam satis in obsequijs supremo Numini exhibendis, ijsque præstandis, quæ eorum statui consentanea sunt, exerceri valeant; plurimum in Domino commendamus pium morem in plerisque Hispaniarum Diœcesibus vigentem, vt Clerici tam in minoribus, quàm in maioribus Ordinibus constituti, atque etiam Presbyteri, tametsi Beneficia, vel Officia Ecclesiastica non habentes, superpelliceo induti in Ecclesijs, quibus adscripti fuerint, Missæ Conuentali cum Cantu celebratæ, necnon primis, & secundis Vesperis Officij diebus Dominicis, alijsque Festis assistant. Quin imò enixè hortamur, vt Episcopi aliarum Diœcesum, in quibus mos ille institutus hætenus non fuerit, id in posterum seruari curent in omnibus, ac insuper satagant, vt omnes Ecclesiastici prædicti etiam collationibus habendis coram Parochis suis, vel alijs ab Episcopo deputatis super casibus conscientie forum conuenerint, & super ritibus, ac cœremonijs sacris intersint.

Et quoniam in prædictis Hispaniarum Regnis reperiri intelleximus Beneficia, & Cappellanas etiam de Iurepatronatus, vel Ecclesiasticorum, vel Laicorum, nullo tamen certo prouentu instructas, vel adeo tenui, vt nec ad dimidiam, nec ad tertiam partem congruæ pro Clericis ad sacros Ordines promouendis necessaria ascendat; malis haud quidem leuib; inde erumpentibus occurrere cupientes, statuimus, & mandamus, quod Episcopi ad Beneficiorum, & Cappellaniarum, quæ nullum certum redditum habent, suppressionem statim deueniant. De alijs verò Beneficijs, & Cappellanijs, quarum certus annuus fructus ad memoratam saltem tertiam Congruæ partem non ascendit, decernimus nulli in posterum conferendam esse primam Tonsuram ratione iuris assequendi ali-

quod ex dictis Beneficijs, & Cappellanijs. Utque Patrobatuum iura, quantum fieri possit, salva remaneant; liceat Patronis tam Ecclesiasticis, quam Laicis ad dicta Beneficia, & Cappellanias nominare, non tamen veluti ad Beneficia Ecclesiastica preerogantia in nominandis primam Tonsuram, sed tanquam ad legata pia; & nominati, tamen si primam Tonsuram non habentes, ea retinere possint uti pia legata cum onere adimplendi omnia onera a Fundatoribus iniuncta.

Non sine graui animi nostri dolore etiam accepimus, quod, quamquam Tridentina Synodus decreuerit omnes, qui Parochiales, vel alias curam Animarum annexam habentes Ecclesias quocumque modo obtinent, debere diebus saltem Dominicis, & Festis solemnibus plebes sibi commissas pro sua, & earum capacitate pascere salutaribus verbis, docendo ea, quæ Christi fideles ad salutem scire oportet, ac explicando Diuinæ legis præcepta, Fideique Dogmata, puerosque eiusdem Fidei rudimentis imbuendo, & breui, facillique sermone vitia denuntiando, quæ declinare, & virtutes, quas sectari oporteat; nihilominus nonnulli Parochialium Ecclesiarum Rectores, hæc, quæ suarum partium adeo sunt, prætermittunt, culpam huiusmodi a se amoliri nitentes, vel prætextu immemorabilis, sed quidem prauæ consuetudinis, vel quia hæc ab ipsis præstari necesse non videatur, superpetent nimirum copia aliorum habentium Sacras Conciones in alijs Ecclesijs, itemque imbuentium pueros Mysterijs Fidei vel in scholis, vel in compitis. Ne itaque sub inani istarum, aliarumque similium excusationum prætextu tanta Christianæ Reipublicæ pernicijs fruatur, districtè præcipimus singulis Hispaniarum Archiepiscopis, & Episcopis, ut omnino efficiant, quod omnes ij, qui Animarum curam gerunt, munia prædicta per seipsos, vel si legitime impediti fuerint, per alios idoneos diligenter exequantur. Si verò aliqui non satis habiles ad illa obeunda reperiantur; ijdem Archiepiscopi, & Episcopi per alios a se deputandos sumptibus Parochorum minus idoneorum opportunè suppleri curent: & in posterum Beneficia, quibus Animarum cura imminet, non nisi verè idoneis ad memorata Officia per seipsos adimplenda conferantur.

Præterea, ne Constitutionis Sancti Pij V. etiam Prædecessoris Nostri, in qua taxatur congrua fructuum portio Vicarijs perpetuis Animarum curam exercentibus assignanda, interpretationem ab eius sententia alienam fieri contingat; declaramus Constitutionem illam pertinere dumtaxat ad Vicarios perpetuos illarum Ecclesiarum Parochialium, quæ alijs Ecclesijs, Monasterijs, Collegijs, Beneficijs, & Locis Pijjs vnitæ sint: necnon portionem annuam fructuum, quæ ibidem statuitur assignanda ipsis Vicarijs in summa non maiori, quàm centum, nec minori, quàm quinquaginta scutorum, intelligi

debere de scutis argenteis iuliorum decem monetæ Romanæ pro quolibet scuto .

Quoties itaque in alijs Parochialibus Ecclesijs, quæ, ut præfertur, vnitæ non sint, oportuerit ex aliqua iusta causa prouideri per Coadiutores Parochorum, aut per Vicarios temporarios; curæ erit Episcopis pro data sibi a Tridentina Synodo potestate partem fructuum prædictis Coadiutoribus, aut Vicarijs assignandam determinare in ea quantitate, quæ pro suo prudenti arbitrio, & conscientia conueniens videbitur, ratione videlicet habita reddituum, & emolumentorum Ecclesiæ Parochialis, in qua deputati fuerint, nec non inspectis conditionibus Loci, numero Animarum, qualitate laboris, & quantitate impensarum, quas commissi Officij necessitas postulauerit. Quod si Parochi ab Episcopis moniti, congruo iisdem termino præfixo, Coadiutores, siue Vicarios temporarios, quoties opus fuerit, assumere neglexerint; poterunt ipsi Episcopi eos, quos huic muneri idoneos censuerint, auctoritate propria deputare cum assignatione antedictæ portionis fructuum. Et nihilominus, vbi etiam prædicti Coadiutores, aut Vicarij temporarij a Parochis nominati, vel assumpti fuerint, de eorum idoneitate Episcopis constare per examen debeat, antequam ad exercitium admittantur; nec satis sit, quod ad Confessiones audiendas antea fuerint approbati, nisi alijs etiam qualitatibus ad Curam Animarum rectè exercendam opportunis præditi noscantur. Quibus si careant, nec Parochi deinde intra alium similem terminum ab Episcopis præfigendum alios verè idoneos nominauerint: tunc pariter ad ipsos Episcopos liberè spectet deputatio cum dictæ congruæ assignatione; nec vlla Parochorum contradictio, aut exemptio, aut appellatio, aut cuiuscumque Iudicis inhibitiõ executionem deputationis, & assignationis certæ partis fructuum in casibus præmissis suspendere possit, itemque non obstante qualibet contraria consuetudine, etiam immemorabili.

Verùm quia non satis Animarum curæ, & necessitatibus quandoque consultum est per hoc, quod ad obeunda Parochialia munia alij Sacerdotes Parochis adiungantur, sed maiora remedia adhiberi oportet, quoties nempe ob Locorum distantiam, siue itineris difficultatem Parochiani sine magno incommodo pro Sacramentis percipiendis, Diuinisque Officijs audiendis accedere ad Ecclesiam Parochialem nequeant; tunc quidem meminerint Episcopi licere sibi pro suo arbitrio, inuitis etiam Rectoribus, vel intra easdem Parochias destinare alias Ecclesias, in quibus Sacerdotes Parochorum Coadiutores Sacramenta ministrent, & Diuinum Cultum exhibeant, vel nouas Parochias, nouasque Parochiales Ecclesias a veteribus distinctas constituere, ijsque nouos Parochos præficere, assignata ex redditibus ad veterem Parochialem Ecclesiam quomodocumque pertinentibus conuenienti portione ad victum eorum

rum, qui, vel tamquam Coadiutores in dictis alijs Ecclesijs deputati, vel tamquam distincti, & independentes Parochi curam Animarum exercuerint; nulla ad præmissa impedienda suffragante appellatione, aut inhibitione,

Cum ad præscriptum quoque Tridentinæ Synodi Episcopis is honor tribuendus sit, qui eorum dignitati conuenit, eisque in Choro, & in Capitulo, in Processionibus, & alijs actibus publicis primus locus esse debeat, & præcipua omnium rerum agendarum auctoritas; mandamus id religiosè, ac perpetuò obseruari in omnibus actibus adeo iustæ huiusmodi præminentia, & auctoritati consentaneis, non obstantibus priuilegijs etiam ex fundatione competentibus, consuetudinibus etiam inmemorabilibus, sententijs, iuramentis, & concordijs, quæ suos tantum obligent Auctores.

Præterea, vt claustralis quoque disciplina vigor illibatus permaneat, Pontificæ nostræ sollicitudinis partes etiam duximus interponendas. Cùm itaque experientia compertum fuerit quantum detrimenti illi afferatur, ex quo plures ad religiosum habitum admittantur, quàm vires reddituum patiantur; moderno, ac pro tempore existentis Nostro, & Apostolicæ Sedis in iisdem Hispaniarum Regnis Nuntio per præsentis committimus, & mandamus, vt curet, & vigilantiam adhibeat, ne contra præscriptum memorati Concilij Tridentini in Monasteria, Conuentus, & Domos, tam Virorum, quàm Mulierum, siquæ Bona immobilia possideant, siue non possideant, maior numerus recipiatur, quàm qui, vel ex prouentibus proprijs ipsorum Monasteriorum, Conuentuum, aut Dommorum, vel ex consuetis elemosynis, alijsue quibuscumque obventionibus, in commune tamen conferendis, commodè possit sustentari.

Quoties verò Regulares ad Ordines erunt promouendi, seruetur omnino Decretum Congregationis Cardinalium Concilij Tridentini Interpretum a piæ memoriæ Clementis Papa VIII, Prædecessore etiam nostro confirmatum die. 15. Martij 1596., quo sancitur non ad alium, quàm ad Episcopum Diocesanus literas Dimissorias pro eorumdem Ordinum susceptione a suis Superioribus esse dirigendas, præterquam in casu, quo Diocesanus a Diocesi abesset, vel ordinationes non esset habiturus; quo etiam casu in litteris Dimissorijs ad alium Episcopum dirigendis expressa fieri debeat mentio, vel de prædicta Episcopi Diocesani absentia, vel de illa alia causa, videlicet, quod Ordinationes non sit habiturus: exceptis tamen quoad prædicta Regularibus illis, quibus per speciale priuilegium a Sede Apostolica post Concilium Tridentinum fuerit concessum, vt a quolibet Catholico Antistite Ordines suscipere possint, super quo Indulto nihil per præsentis innouare intendimus. Nouerint autem Episcopi se debere per semetipsos, secluso ægrota-

tio-

tionis casu, Ordines conferre, & sacrorum Ordinum collationem, statutis a iure temporibus, ac in Cathedrali Ecclesia, vocatis, & adstantibus Canonicis, publicè habendam esse; vel si in alio Dioecesis loco, semper tamen in Ecclesia quantum fieri poterit digniori, & præsentè Clero eiusdem loci. Ne verò incertitudo, an ipsi ordinationes sint habituri, nimis graue afferat incommodum promouendis, varia Dioecesis loca inhabitantibus; per mensem ante singulis vicibus publico Edicto ab iisdem Episcopis denuntietur, se ordinationes esse habituros, adeo ut quoties denuntiatio huiusmodi facta non fuerit; inde satis intelligant Regulares, Episcopum Dioecesanum Ordinationes ea vice minimè esse habiturum, sibi que idcirco licitum futurum Ordines ab alio Episcopo suscipere cum litteris Dimissorij suorum Superiorum ad eum directis, seruata in ijs forma superius expressa.

Episcopi in omnibus Mulierum Monasterijs sibi subiectis Ordinaria, in alijs verò exemptis auctoritate Sedis Apostolicæ inconcussè obseruari curent, quæ circa Sanctimonialium clausuram, vetitumque in dicta Monasteria ingressum, tam in Decretis Tridentinæ Synodi, quam in Constitutione similis memoriæ Gregorij Papæ XIII. etiam Prædecessoris Nostri edita Idibus Ianuarij anni millesimi quingentesimi septuagesimi quinti prouidè ordinata sunt.

Pendentibus etiam Christianæ Reipublicæ in primis expedire, vt ministerium, ac potestas clauium in remittendis, retinendisque peccatis rectè exerceatur; declaramus Sacerdotes, tam Sæculares, quam Regulares, qui ab Episcopis obtinuerint licentiam audiendi Confessiones limitatam, vel quoad locum, vel quoad genus Personarum, vel quoad tempus, non posse pœnitentiæ Sacramentum administrare extra tempus, vel locum, vel genus Personarum ab ipsis Episcopis præscriptum, quocumque priuilegio etiam in vim Bullæ, quæ appellatur Cruciatæ Sanctæ, competente nullatenus suffragatur. Cumque idem Innocentius Prædecessor per suas die decima nona Aprilis anni millesimi septingentesimi expeditas litteras decreuerit Sacerdotibus tam Sæcularibus, quam Regularibus non licere confessiones eorum, a quibus ex Indulto prædictæ Bullæ Cruciatæ ad id electi fuerint, audire, absque præcedenti approbatione Ordinarij illius Loci, in quo ipsi Pœnitentes degunt, & Confessores eligunt, etiamsi ab Ordinarijs aliorum Locorum antea approbati fuissent, ac etiamsi Pœnitentes Ordinarijs illis, qui Confessores Electos approbassent, subditi essent; necnon Confessiones aliter factas, ac respectiue exceptas, nullas fore, irritas, & inualidas, & Confessores ipso iure suspensos esse: Nos eandem Constitutionem approbantes, confirmantes, & innouantes declaramus insuper prædictis Sacerdotibus tam Sæcularibus, quam Regularibus ad confessiones excipiendas, vel ex vi prædictæ Bullæ Cruciatæ, vel ex quocumque alio Priuilegio electis suffragari minimè etiam posse,

se, quòd approbati aliàs fuerint ab Episcopo illo, qui aliquando fuerit Ordinarius Loci, in quo Confessiones audiendæ sint, sed talis tunc temporis ampliùs non existat, vel quia ab humanis exceſſerit, aut Episcopatu renuntiauerit, vel quia ad aliam Ecclesiam auctoritate Apostolica translatus reperiatur; sed necessariam omnino esse illius, qui actualiter, & pro tempore Ordinarius Iurisdictionem in ea Diocesi exerceat, approbationem. Hæc tamen suffragetur etiam tacita, eaque adesse censeatur, quousque præcedens licentia, siue approbatio duret, & reuocata ab eo non fuerit; in quo casu noua, & expressa impetranda erit, si illa præcedenter obtenta, vel per temporis adscripti lapsum expirauerit, vel per posteriorem reuocationem sublata fuisset.

Meminerint quoque Regulares se excipere non posse Confessiones Monialium, tametsi eorum regimini, & gubernio subiectæ sint, nisi ultra licentiam suorum Prælatorum Regularium præcedat examen coram Episcopo Diocesano faciendum, eiusque specialis quoad Confessiones dictarum Monialium approbatio; remota quacumque contraria consuetudine, etiam immemorabili.

Cumque ex eodem Concilio Tridentino Confessor extraordinarius bis, aut ter in anno offerri Monialibus debeat, qui omnium Confessiones audiat; si in posterum Superiores Regulares quoad Monasteria ipsis subiecta toties prædictum extraordinarium Confessorem deputare neglexerint, vel si etiam ex proprio eodem Ordine semper deputauerint, nec saltem semel in anno ad id munus elegerint Sacerdotem aut Sæcularem, aut Regularem alterius diuersi Ordinis Professore: in his casibus Episcopi pro suo arbitrio, & conscientia deputationem huiusmodi facere possint, nec illa quouis titulo, aut prætextu a Superioribus Regularibus valeat impediri.

Episcopi insuper abusus omnes, qui in Ecclesijs aut Sæcularibus, aut Regularibus contra præscriptum Cæremonialis Episcoporum, & Ritualis Romani, vel rubricas Missalis, & Breuiarij irreperint, studeant omnino remouere. Et, si aduersus ea, quæ in dicto Cæremoniali statuta sunt, consuetudinem etiam immemorabilem allegari contingat; postquam recognouerint, aut eam non satis probari, aut etiam probatam suffragari, utpote irrationabilem, de iure non posse: executioni eorum, quæ in dicto Cæremoniali constituta sunt diligenter incumbant; nec vlla suspensiuæ appellatio admittatur.

Sedulò pariter curent iidem Episcopi, vt eliminentur abusus, si qui forsan, tam quoad Ecclesiasticos Sæculares, quàm quoad Regulares inducti fuerint aduersus Concilij Tridentini Decretum de obseruandis, & euitandis in celebratione Missarum sess. 22., & contra Regulares, si opus fuerit, procedant ex Apostolica delegatione in eo decreto ipsis indulta, postposita quacumque appellatione suspensiuæ, sed solum reseruata in deuolutiuo super quocumque dubio, quod

quod excitari contingeret, declaratione Congregationis pro tempore existentium S.R.E. Cardinalium memorati Cōcilij Interpretum. Cumque circa Missarum celebrationem in priuatis Oratorijs, necnon circa vsū Altaris gestatorij, a recol. mem. Clemente Papa XI. Prædecessore etiam nostro opportunum Decretum promulgatum fuerit die 15. Decembris anni 1703: Episcopi deūt operam, vt omnia ibidem Statuta etiam in Regnis Hispaniarum seruentur, idemque Decretum in suis respectiue Diocæsisbus, vt facilius omnibus innotescat, publicari faciant, addita etiam prohibitione, ne in priuatis Regularium Cellis, siue Cubiculis erigatur Altare pro re Sacra ibidem facienda, & contra quoscumque contrauenientes censuris etiam Ecclesiasticis procedant, adhibita quoad Regulares auctoritate Sedis Apostolicæ in memorato Decreto ipsi delegata, remotaque quacumque contraria consuetudine, etiam immemorabili. Declaramus tamen, quod cum in prædicto Decreto statuatur, non licere Episcopis extra Domum propriæ habitationis in Domibus Laicis erigere Altare, ibique Sacrosanctum Missæ sacrificium celebrare, siue celebrari facere; huiusmodi prohibitio intelligenda non sit de Domibus etiam Laicis, in quibus ipsi Episcopi forte occasione Visitationis, vel itineris hospitio excipiantur, vt nec etiam, quando Episcopi in casibus a Iure permissis, vel de speciali Sedis Apostolicæ licentia absentes a Domo propriæ ordinariæ habitationis, moram idcirco faciant in aliena Domo per modum similis habitationis: his enim casibus licita ijs erit erectio Altaris ad effectum prædictæ celebrationis, non secus, ac in Domo propriæ ordinariæ habitationis.

Præcipimus quoque accuratè attendi, ac adimpleri quæcumque alia præscribuntur in eiusdem Generalis Synodi sess. 25. de Regularibus, & Monialibus. Cumque in cap. 25. amplissimè derogetur omnibus contrarijs Priuilegijs sub quibuscumque formulis verborum conceptis, ac Mare magnum appellatis, etiam in fundatione obtentis, necnon Constitutionibus, & Regulis etiam iuratis, atque etiam consuetudinibus, vel Præscriptionibus, etiam immemorabilibus; sciant omnes derogationem huiusmodi non ad ea tantum referri, quæ in prædicto Capite continentur, sed etiam ad alia, quæ in singulis superioribus Capitibus eiusdem sessionis constituta sunt.

Ad hæc, vt recta in Iudicij ratio seruetur, præcipimus, quod ubi in Causis Criminalibus Ordinarij Locorum in Regnis Hispaniarum procefferint ex Officio, hoc est non ad vllius querelam, siue accusationem, si ab eorundem Ordinariorum Sententijs appellatio, vel ad Sedis Apostolicæ Nuntium, vel ad Metropolitanos interposita fuerit; tunc (ne alioquin, si nullus Actoris partes gerat, delinquentes pœnam suis criminibus debitam effugiant), Procuratores Fiscales Tribunalis Nuntiaturæ Apostolicæ, & respectiue etiam Curie Metropolitanæ, instantias, aliosque actus desuper necessa-

cessarios peragant, & prosequantur, vt predictæ Ordinariorum
sententiæ iustam confirmationem, & executionem obtineant,
Quod si dictis Procuratoribus Fiscalibus non citatis, & inauditis,
contrarias Sententiæ in gradu appellationis proferri contigerit;
istæ prorsus nullæ sint, ac irritæ cum omnibus actis gestis, nullum-
que sortiri debeant effectum: quin immo præcedentes Ordinario-
rum sententiæ executioni mandentur, perinde ac si appellatio ab
ijs interposita nullatenus fuisset.

Ceterum cum generaliter circa appellationes, & inhibitiones satis
pronisum fuerit per Constitutionem piæ mem. Innocentij Papæ IV,
Prædecessoris etiam Nostri in Cap. *Romana*, ac etiam per Decre-
ta Concilij Tridentini, itemque alia edita die 16. Octobris 1600.
à Congregatione Negotijs, & Consultationibus Episcoporum, &
Regularium præposita, & a præfato Clemente VIII. Prædecessore
confirmata, ac denique etiam alia promulgata tempore Pontifica-
tus similis mem. Urbani Papæ VIII. Prædecessoris itidem Nostri,
die videlicet 5. Septembris 1626., volumus, & mandamus, quod
quidquid in omnibus memoratis Constitutionibus, & Decretis
statuitur, diligentissimè per omnes ijs comprehensos obseruetur in
Causis ad Curias Ecclesiasticas pertinentibus in Regnis Hispania-
rum; quacumque consuetudine etiam immemorabili, vel quouis
priuilegio, aut stylo concedendi etiam quasdam Inhibitiones nun-
cupatas temporarias penitus excluso.

Quo verò ad Iudices Conseruatores, & modum, ac facultatem proce-
dendi in Causis Ciuilibus, quæ ad eorum cognitionem pertinere
possint, inuiolatè custodjenda erit norma præscripta in Constitutio-
nibus sel. rec. Innocentij IV., Alexandri IV., Bonifacij VIII.,
Gregorij XV., aliorumque Romanorum Pontificum Prædecesso-
rum Nostrorum hac de re editis, nechon in Decretis Concilij Tri-
dentini, sub pœnis ibidem contentis, quas præsentis nostra Constitu-
tione innouamus, & confirmamus; hoc etiam addito, vt iidem
Iudices Conseruatores, & mandatorum suorum Executores exhibere
debeant Episcopis, alijsque locorum Ordinarijs litteras suæ
deputationis, quorum vigore procedere intendant.

Enixè denique, & ex intimo Paterni Cordis Nostri sensu omnes e re-
ligiosissima Hispanica Natione monemus, vt memores sint teneri
se exactè, firmiter, & cum effectu obseruare etiam omnia, & sin-
gula in cæteris omnibus eiusdem Tridentini Concilij Decretis san-
ccta, Et ne eorum executio post hac villo modo impediatur, aut re-
tardetur; decernimus, ac declaramus nullum pro impedienda, aut
suspendenda executione Conciliarium sanctionum eiusmodi, aut
Decretorum, quæ ab Ordinarijs edita fuerint pro executione pari-
ter eorum, quæ in ipso Concilio statuta sunt, suffragari posse, ac
debere contrarium Priuilegium, quod ante prædicti Concilij pro-
mulgationem a Sede Apostolica obtentum fuerit, nisi etiam post
ipsum

ipſum Concilium fuerit in forma ſpecifica ab eadem Apoſtolica Sede confirmatum, vel nouiter conceſſum; itemque obſtare non poſſe vllum Statutum, vel Concordiam, quæ a prædicta Apoſtolica Sede ſpecialiter confirmata non ſit, neque quemcumque longæum non vſum, aut contrariam conſuetudinem, vel præſcriptionem etiam centenariam, vel immemorabilem, niſi forſan præfatæ conſuetudinis, aut præſcriptionis materia capax ſit, & inſuper conſuetudo, aut præſcriptio immemorabilis probata iam ſit, & admiſſa a competenti Iudice per tres Sententias conformes, vel per vnam, quæ in iudicatum tranſierit, nec demum quamcumq; appellacionem, ſiue inhibitionem etiam temporariam; reſeruato dumtaxat reſuſu in deuolutiuo ad memoratam Congregationem Cardinalium eiufdem Concilij Interpretum; quibus etiam tamquam Exequutoriis præſentium noſtrarum litterarum, non ſolum committimus, & mandamus, vt eas, ipſarumque Decreta, & Ordinationes omnes perpetuò, & inuiolabiliter obſeruari faciant cum eadem poteſtate, quæ iſdem Cardinalibus a Sede Apoſtolica tributa eſt pro executione Decretorum memorati Concilij, ſed etiam priuatiuè facultatem impertimur, quodcumq; opus fuerit, interpretandi, explicandi, ac declarandi eandem noſtram Conſtitutionem, omneſque, & ſingulas Ordinationes in ea contentas (exceptis hiſ, quæ ad Cœremoniale Episcoporum, Rituale Romanum, & Rubricas Miſſalis, & Breuiarij pertinent) quatenus illis dubietas aliqua, aut difficultas emerſerit; non retardata tamen interim illarum executione, adeo vt ante huiuſmodi executionem nec vllus reſuſus ad eandem Congregationem Cardinalium, nec vlla ſuper quouis Dubio conſultatio promoueri poſſit. Decretis verò, Declarationibus a prædicta Congregatione faciendis, poſtquam noſtra, aut Romani Pontificis pro tempore exiſtentis approbatio acceſſerit; ſtatim quæcumque reclamatio, aut conſultatio omnino ceſſare, perpetuumque ſiſtentium deſuper impoſitum cenſeri debeat.

Decernentes pariter eaſdem præſentes literas ſemper firmas, validas, & efficaces exiſtere, & fore, ſuoſque plenarios, & integros effectus ſortiri, & obtinere, ac illis, ad quos ſpectat, & pro tempore quodcumque ſpectabit, in omnibus, & per omnia pleniffimè ſuffragari, & ab eis reſpectiuè inuiolabiliter, & inconcuſſè obſeruari debere; ſicque, & non aliter per quoſcumque Iudices Ordinarios, & Delegatos, etiam Cauſarum Palatij Apoſtolici Auditores, ac eiufdem Sanctæ Romanæ Eccleſiæ Cardinales, etiam de Latere Legatos, ac Sedis præfatæ Nuntios, alioſue quoslibet quacumque præminentiam, & poteſtate fungentes, & functuros, ſublata eis, & eorum cuiſlibet quauis aliter iudicandi, & interpretandi facultate, & authoritate, vbique iudicari, & deſiniri debere; ac irritum, & inane, ſi ſecus ſuper hiſ a quoquam quauis auctoritate ſcienter, vel ignoranter contigerit attentari.

Non obstantibus præmissis, ac quatenus opus sit, nostra, & Cancellaria Apostolica regula de iure quæsito non tollendo, alijsque Constitutionibus, & Ordinationibus Apostolicis, necnon quorumcumque Ordinum, Congregationum, Institutum, & Societatum, etiam Iesu, & quorumvis Monasteriorum, Conuentuum, Ecclesiarum, locorum Piorum, alijsque quibusvis etiam Iuramento, confirmatione Apostolica, aut quavis firmitate alia roboratis Statutis, & Consuetudinibus, ac præscriptionibus quantumcumque longissimis, & immemorabilibus, Priuilegijs quoque, Indultis, & litteris Apostolicis, Ordinibus, Congregationibus, Institutis, & Societatibus, etiam Iesu, ac Monasterijs, Conuentibus, Ecclesijs, & locis Pij prædictis, illorumque respectiue Superioribus, alijsque quibuslibet personis, etiam specialissima mentione dignis, sub quibuscumque verborum tenoribus, & formis, ac cum quibusvis etiam derogatoriis derogatorijs, alijsque efficacioribus, & insolitis clausulis, irritantibusque, & alijs Decretis, etiam motu, scientia, & de Apostolica potestatis plenitudine in genere, vel in specie, seu aliàs quomodolibet in contrarium præmissorum concessis, confirmatis, & innouatis. Quibus omnibus, & singulis, etiam si pro illorum sufficienti derogatione de illis, eorumque totis tenoribus specialis, specifica, expressa, & indiuidua, ac de verbo ad verbum, non, autem per clausulas generales idem importantes mentio, seu quæuis alia expressio habenda, aut aliqua alia exquisita forma ad hoc seruanda foret, illorum omnium, & singulorum tenores, ac si de verbo ad verbum exprimerentur, & infererentur, nihil penitus omisso, & forma in illis tradita obseruata, eisdem præsentibus pro expressis, & insertis habentes, illis aliàs in suo robore permanens, ad præmissorum effectum hac vice dumtaxat specialiter, & expressè derogamus, ceterisque contrarijs quibuscumque.

Volimus autem, vt earumdem præsentium literarum transumptis, seu exemplis, etiam impressis, manu alicuius Notarij publici subscriptis, & sigillo alicuius Personæ in Dignitate Ecclesiastica constitutæ munitis, eadem prorsus fides, tam in Iudicio, quàm extra illud vbi que adhibeatur, quæ ipsis præsentibus adhiberetur, si forent exhibitæ, vel ostensæ. Datum Romæ apud S. Mariam Maiorem sub Annulo Piscatoris die xij. Maij 1723. Pontificatus Nostri Anno Secundo.

F. Card. Oliuerius.